

COLUMNA

«Vus essas in anghel»

MARIA CADRUVI

Jau na ma regord betg ch'insatgi m'avess ditg insacura che jau saja in anghel. Ma in lavurdi da schaner da quest onn m'èsi capità.

Igl era las 14.45. Jau aveva gist prendì plaz en il tren da Cuira vers la Surselva. En in vagun da segunda classa ch'era anc praticamain vid avev'jau tschernì in cumpartiment da vart dretga. In um giuven, forsà tranter 20 e 25, prenda plaz en il cumpartiment da l'austra vart e ma pledenta immediat. El haja ina dumonda, u meglier ditg ina supplica, di el, ed agiunta: «I bin kai Bösa.» El haja dad ir cun il tren a Mustér ed haja fatg giu che ses patrun da lavur vegnia cun el. Ma quel vegnia pir a Rehanau en il tren. Ed uss haja el in problem. El n'haja betg daners per cumprar il bigliet. «Und das könnt as Drama ge.» Sche jau na pudess betg emprestar ad el ils daners per quest bigliet. Jau guard sin el. Senza che jau dumond, di el co el haja num. Prenom e num. Gea, tge ch'il bigliet custia, vi jau savair. «59.90». El n'haja halt betg il halbtax e dovria retour. El giaja per il bigliet e turnia a seser qua en ses cumpartiment, sincereschà el. Ed a Rehanau survegnia el ils daners da ses patrun e sappia lura turnar els a mai. El guarda sin mai cun egl's d'in bernhardiner. Tge istorgia!



Forsà ha el scumess cun in collega che ses tric funcziunia e tshertga ussa la cumprova. Forsa è el in da quels che sto avair daners perquai ch'el dovra urgentamain puspè ina raziun. E forsà è sia istorgia vaira?

Jau guard sin l'ura. Las 14.48. En otg minutas parta il tren. Sch'el vul anc ir per ses bigliet, lura stoss jau far vinavant, vai tras mes chau. Jau avrel instintivamain la bursa, guard sin el e ditg: «Jau fid a Vus.» E dun ad el ina da 50 ed ina da 10. El prenda ils daners ed enten bandunar il vagun di el: «Sie sind an Engel!»

Cura ch'jau hai udì dad el quests plets hai jau savì: Quel na turna betg pli. Ed uschia èsi stà. Ils 60 francs na m'han betg fatg mal il venter. Ma tge che m'ha irrità è stà mes cumportament durant questas trais minutas. In'ureglia averta per ina supplica ed in zichel commiseraziun – gea. Ma dad alertadad e spiert

critic – nulla. Forsa èsi stà mes mal ils dents che tugnava dapi insaquants dis che jau aveva stuì laschar trair ora dus. Forsa èsi stà ina bella stancladad sunter che jau aveva finì l'avantmezdi la lavur dad autobiografia cun ina gruppà. E forsà èsi simplamain stà la mancanza d'energia da dir na ed il regl da guardar tge che capita.

Sin il viadi tras la Ruinaulta m'èn lura sa chapescha vegnidas endament tut las dumondas ch'jau avess duì far al cumpogn. Pertge na preschentais Vus betg Voss problem a l'accumpagnadra dal tren che stat en sia unifurma là ora sin il perrun? Pertge na prendais betg mo in bigliet simpel fin a Rehanau? Pertge na laschais betg Vossa giacca blava sin il sez en il cumpartiment enfin che Vus turnais?

Tgi sa tge ch'el ha patratgà da mai, sun jau ma dumandada. Dunna veglia naiva u dunna generusa ch'ha serrà in egl? Basta, per finir m'hai jau ditg cun quest surrir dad ina persuna ch'è sa laschada traplar: In tal cumpliment da tsel mund per mo 60 francs – quai n'è betg nagut. Che jau saja in anghel n'aud jau forsà mai pli en mia vita.

Maria Cadruvi, anteriura redactura RTR, stat a Ruschein e maina ina «impulseria».